

Berita Harian

AKHBAR RAKYAT, AKBAR ANDA

BERITA HARIAN, SABTU, 1 MEI, 1982

KHIDMAT UNTUK RAKYAT DAN KERAJAAN

Bahan asal dari Arkib
Negara Malaysia

RENCANA PENGARANG

DENGAN terumumnya nama ahli-ahli Kabinet Datuk Seri Dr. Mahathir Mohamad yang baru, nama-nama timbalan menteri dan setiausaha parlimennya maka lenyaplah sudah setidak-tidaknya sebahagian besar dari teka-teki dan keresahan di pihak-pihak tertentu baik yang berharap memimpin mahupun yang gigih menyokong. Kini sudah tibalah waktunya untuk tenaga parti ditumpukan sepenuhnya kepada usaha menggerakkan sebuah Kerajaan yang cekap dan yang mampu menghasilkan aspirasi dan cita-cita kemajuan dan pembangunan yang telah dilaung-laungkan.

Susunan Kabinet dan barisan utama pemimpin Kerajaan ini dapat dilihat bukan sahaja sebagai suatu percubaan oleh Datuk Seri Dr. Mahathir untuk melahirkan suatu sistem kepimpinan yang lebih cekap (dengan membawa masuk lebih ramai pemimpin-pemimpin yang mempunyai latarbelakang pend-

idikan dan pengalaman profesional yang kukuh) dan stabil (dengan mengekalkan pada sebahagian besarnya kedudukan menteri-menteri yang mempunyai pengalaman luas), malah susunan ini juga membayangkan suatu keinginan untuk memperbaikiimbangan perwakilan di antara parti-parti dan kumpulan-kumpulan penting yang menganggotai Barisan Nasional.

Umpamanya, walaupun pada umumnya struktur pembahagian portfolio tidak berubah namun UMNO, MCA dan MIC, selaras dengan prestasi mereka yang baik dalam pilihanraya lalu, telah mendapat tambahan satu jawatan timbalan menteri tiap-tiap satu, dan Gerakan pula menerima tambahan satu jawatan setiausaha Parlimen. Pengemukaan 12 muka-muka baru termasuk enam timbalan menteri dan enam setiausaha Parlimen dari kumpulan-kumpulan yang lebih muda dan tambahan empat lagi jawatan timbalan menteri wanita itu pula jelas mem-

bayangkan hasrat memperkuat perwakilan pemuda dan wanita dalam pucuk pimpinan Kerajaan.

Tetapi sebagaimana yang ditegaskan oleh Datuk Seri Dr. Mahathir sendiri, pemilihan tokoh-tokoh ini adalah terutamanya berdasarkan kebolehan dan kesediaan mereka untuk berkhidmat kepada Kerajaan dan rakyat. Dan atas dasar inilah juga sumbangan mereka akan diukur. Untuk mereka yang terpilih cogan kata cekap, bersih dan amanah itu perlulah dijadikan amalan harian mereka. Pemimpin yang lembab, menyeleweng atau gagal memikul amanah rakyat untuk menghasilkan kemajuan untuk masyarakat dan negara, nampaknya, tidaklah akan kekal. Oleh itu tanggungjawab pemimpin kita yang telah dipilih ini amatlah berat dan tentulah tidak akan mudah dipikul tanpa menumpukan sepenuh perhatian dan usaha mereka kepadanya.